

2 Tasalonikaya

*Deleewar Mbulus chirethleng nən
Tasalonikaya dā*

¹ Kyagha deleewar dāba ya a har nda Mbulus, tə Sila tə Timoti. Chirethleng nggan ndən fatakwaya Yeeso də na Tasalonika, a kun tsauka yi Faara na Chindi tə Chinəm Yeeso Kərəsti. *

² A fərangga Faara na yinəm China, tə Chinəm Yeeso Kərəsti nggayirha kun tə tsawud dədəmnggirha.

Hwan Faara tə usaarha

³ Shayina, kamdə a usa Faara nan kətsar kəsər ka kun, tsaunən fərkəkafekkid nun aten chikrha kaan, heu tə nggəməndə nun a ndan aten chikrha.

⁴ Ndən ənagha ndən, nan taala tə kun ahur fingya fatakkwaya Yeeso, kəsər ka kərəssə nun, tə fərkəkafekkid nun tə səsaarha nanun ahurghən.

⁵ Ənggini heu ya kyaddə ndaarha ngwa kumad Faara mbə wura hasə wa, məməl dūn a tsawun hu kutəryid Faara kəsər aten kutəryidda ni ya nun a səsaarha kamanggən.

⁶ Na kəkafek sə a fad Faara, kəsər nən a səsang fingya yini səsangga kun,

⁷ amma nən a yibang kun ahu səsaarha nanun sə tə kan kəm, a sayiddi na Yeeso a bərha hai a talara heu tə mamngya fathləngya Faara.

* **1:1 1:1** Tar Fat. 7:1

⁸ Tə sheneu waarha, nən a səsang fingya kargha sənda Faara, kəmda tə fingya kargha əna taara tə Labara na mbənggən yi Chinəm Yeeso.

⁹ Na nda a tək səsarha fa yi mərə pakwandə, tsaha nda hai ma yid Chinəm tə səsəmnda mamnggidghən.†

¹⁰ A fardī nən a wutta ba, nafiyyighən heu na nda a fərang mamnggirha. Kala niifa fərgħa kəkafek na nda a na ənwulteena tə Chinəm, kəsər fərdun kəkafek tə 'ya pərang nan kun.

¹¹ Nanən kee nan naarha hwan Faara a ten nun kətsar, tə ndaarha a tsawun ngga tə Faara aagħa kun. Nan a hwan Faara a fərang səsəmnda kun na a ləgdənggun ənggini heu na nggəngga nun a ənaarha hu fərkəkafek.

¹² Nan a hwan Faara tənə nda manang nda thləm Chinəm Yeeso ahur nun, kun kəm ahurghən, hu nggayid Faara tə Chinəm Yeeso Kərəsti.

2

Na təmbəfeddi a 'wa barha ba, ma Chinəm

¹ Shayina aten wutta Chinəm Yeeso Kərəsti ba nəm a wumnda thləmadghən ba. Nan a hwan kun,

² a billa dūn nduwa thliigha hakkilod nun kəkər aten ndaarha far bəd Chinəm ba 'wadə teena bəda ba wa. A fər dūn kəkafek tə kanda wa, ko ndaana nda hu labaara yi səsəna səkna ndan, nduwa səsəna kyadgha ndən, nduwa wal na nda deleewar a haar nan ba wa.

³ A nggəm dūn fa nggabagħa niifa kun wa. Kəsər mbə fardī a barha ba kee wa, kəl katərana kakyathlaanga hai aten Faara kyagħa

† 1:9 1:9 Ish. 2:10

təmbəlfedda ba 'wan, ndəghənggi kya nanda əna mərri kamənggən.

⁴ Na təmbəlfeddi nən tərang altənggən sə tə kəm mbə midghən sə a sək 'ya nən tsauka yi Faara, nduwa kala 'ya na nanda a tərang shilee teena wa. Nən a tsaurhahu Kən Faara ndagha ndəghən ni Faara.

⁵ Dal wun teena hai 'wadi pərənggən kun a sayiddi nani tə kun wa?

⁶ Nanənya səndun əndi 'yadəngga bərha fa ba, kəsər na nda a kyadghən a məməlla sayidghən.

⁷ Kəsər səsəmnda təmbəlfeddi katərang də əna taara hai bəbee, nən a tsaurha bəbee yandī 'yadəngga baarha fa ba malang də kwamana.

⁸ Tərgha na təmbəlfeddi a kyarha ba, amma a bad Chinəm Yeeso ba, nən a bəlang nda tə səsəmnda bəreu yibədgən.

⁹ Bad təmbəlfedda ba ya nən a naarha tə səsəmnda Sheetan fa, nən a əna tar ənwulteena, tə ənsakhkya yi nggabaarha dədamən-dədamən,

¹⁰ nən naarha huk fīngya na ahu kwamān mərri. Na nda a mərə kəsər kar nda nggəm kəkafek fa na a wal hərəkrha nda.

¹¹ Nanən kee na Faara a thlənang səsəmnda sahatta huteena kanda fa ba ka a fərəkəfek nda tə labar nggabaarha.

¹² Tərgha na nda a ngwang kumarha fīngya sə kargha thlə kəkafek fa amma na nda a tək mbənda tar mbəfeerha fa.

Tsawama tə shembe hu kəkafek

¹³ Amma kan shayina tsaudə tətə a usa Faara nan ka kun kətsar, kun shayina nggəmna Chinəm, kəsər a katəradghən wur Faara kun ahur fīngya

'wagha a wal hərəkrha nun ahu tar Səsəna hu fərkəkafek.

¹⁴ Aaghən kun ka a wal hərəkrha nun a sayiddi pərang nan Labara kun na Mbənggən, tənun wal mamnggit Yeeso Kərəsti.

¹⁵ Tsaunən kee shayina, kərsaama, kəs ənggina nun ha tsahang nan kun ha, ko hu pər labar Faara ni, ko ahu deleewar chireethleng nan kun də.

¹⁶ Nanənya Chinəm Yeeso Kərəsti tafadghən, tə kəm Faara na chindi kyanum, nggəmdə kəm ahu nggayidghən yi pakwandə nggab nən kəm tə shiteena.

¹⁷ A nggab kun nən tə kəm fərang kaali nən kun ahu kala 'ya nun a ənaarha tə thləkrha.

3

Hwana man Faara kan teena

¹ A mii ngwaladghən shayina, hwana man Faara kan teena təna labar Chinəm Yeeso weela də kəkər, tənən wal mamnggirha kala mbərha dənən saadə, kəla 'wanən bərha thləmad nun bə.

² Hwanama Faara, kəmdə, tənəm wal hərəkrha a har fa mbəlfeyya, kəsər mbə fiya heu natə fərkəkafek fa wa.

³ Amma Chinəm nəghən tə kəkafek fa, nən fərang kaali kun laf kun nən amana təmbəfeddi ənang 'ya kun fa.

⁴ Mbərsa dən tə Chinəm kəla nun a ənaarha, dāama mbeedə tə əna taara tə 'ya pərang nan kun.

⁵ Nanənya ngwa kyakhrangga Chinəm hutən nun aten nggəmdə də yi Faara, tə kərəsta kəm hu Kərəsti.

Kəs thləmaarha aten səsaukirha

⁶ Nanənya shayina, nan a ndang nda kun ahu thləm Chinəm Yeeso Kərəsti, ndəghama hai tə səsaukya fingya fa fərkəkafekkyā mbuwa a takkwa ənggini tsahang nan kun ha.

⁷ Kəsər kun tə altennun səndunsə kamdə a takkwa tur ənggina nun tsahang nan kun ha, kəsər a sayiddi na nan tə kun mbə səsaukya ni kan wa.

⁸ 'Wa wan thlə ənnarhami a har niifa kula kan tiighən wa. Nan əna taara nda fədīkrha tə yanfaara, amawa nan kətəlang kun fa.

⁹ Nan mbang ndang nda kun fəraman ənnarhami kan, amma na mid nan sə a tsawan ənsakhrha a tsaha kan nun.

¹⁰ Ko a sayiddi na nan tə kun, ndanggan kun, "Kala niifa kargha əna taara fa a fərang dūn ənnarhami wa."

¹¹ Kəsər sək dən ndaarha fingya ahur nun na səbrha a yid ndan. Mbə 'ya sə na nda ənaarha wa kəl muk mee hu labar fiya hai kee.

¹² Tur nafiniya, nan a ndang nda kanda, nan kəm a kəs thləmad ndan ahu thləm Chinəm Yeeso Kərəsti, əna taara nda, na nda naarha həbang fad ndan.

¹³ Amma kun shayina a dakh mid nun də tə əna əngya kamngga wa.

¹⁴ Ana niifa sə kargha mii nan fa ahu dēleewar diya, a wum dūn teena təghən wa təna shilee kəsang.

¹⁵ Amma a tsawan dūn kəla təsara wa, kəl a kəs thləmadghə nun kəla wanmana.

Mii ngwala nda ən Mbulus

¹⁶ Nanənya Chinəm na tə dədemnggirha ha, ndəghənggi tafadghən fərang dədemnggirha kun kətsar, ko hu mani. A tsauka Chinəm tə kun heu.

¹⁷ NGGI NA MBULUS, KULO NDA ƏNNA YA CHIRETHLENG NI HAI TƏ HARNA NI ƏNAAARHA KEE TƏ DELEEWARYA HEU NI CHIREETHLA TƏNƏN KYAD NDAARHA KYAGHƏN BA A HARNA.

¹⁸ Ngwa tsauka nggayid Chinəm Yeeso Kərəsti tə kun heu. Atsaukake.

Hona Bible
The New Testament in the Hwana language of
Nigeria: Hona Bible

copyright © 2023 The Seed Company in collaboration with Language Developers and Bible Translators Association

Language: Hona (Hwana)

Contributor: Language Developers and Bible Translators

This translation is made available to you under the terms of the Creative Commons Attribution Share-Alike license 4.0.

You have permission to share and redistribute this Bible translation in any format and to make reasonable revisions and adaptations of this translation, provided that:

You include the above copyright and source information.

If you make any changes to the text, you must indicate that you did so in a way that makes it clear that the original licensor is not necessarily endorsing your changes.

If you redistribute this text, you must distribute your contributions under the same license as the original.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

Note that in addition to the rules above, revising and adapting God's Word involves a great responsibility to be true to God's Word. See Revelation 22:18-19.

2025-07-18

PDF generated using Haiola and XeLaTeX on 26 Jul 2025 from source files dated 18 Jul 2025

d942b897-c376-5386-bfaf-e0ce21c59136